

B • I • L • T • E • N

Broj 37



**U DŽEMATU BORÅS 13. APRILA
SVEČANO OTVORENA DŽAMIJA**

**BOSNIAKISKA ISLAMISKA SAMFUNDET I SVERIGE
ISLAMSKA ZAJEDNICA BOŠNJAKA U ŠVEDSKOJ**

WEB: WWW.IZB.SE MAIL: KONTAKT@IZB.SE TEL.: 0520 499 064



SADRŽAJ

Uvodnik	3
Svečano otvorenje džamije u džematu Borås	4
Skupština Islamske zajednice Bošnjaka u Švedskoj	6
Promocija knjige “Priče iz dijaspore i domovinskih Imami IZBUŠ-a posjetili Njemačku	7 8
Sastanak sa ministricom Amandom Lind	9
Sjednica Izvršnog odbora IZBUŠ-a	10
Konferencija o radu sa mladima i seminar za imame	11
Džemat Nörrköping: Donatorsko veče	12
Džemat Malmo: Edukativni seminar za žene	13
Džemat Helsingborg: Tradicionalna Večer Kur’ana	14
Džemat Växjö: Aktivnosti oko sigurnosti lokala	15
Hadž 2019	16
U susret Ramazanu, hutba	17
Zekat i sadekatul-fitr, informacije	19
Ramazanski post: pitanja i odgovori, .hadisi	20
Ramazanska čestitka	22



Poštovani čitaoci!

Nalazimo se u periodu poslije održanih džematskih, kao i Skupštine Islamske zajednice Bošnjaka u Švedskoj.

Tim povodom preporučujemo da svako od nas razmisli o jednom kur`anskom ajetu. Radi se o 159. ajetu sure Alu Imran, u kojem Allah, dž.š., kaže:

„Zahvaljujući milosti Božijoj ti si prema njima blag, a da si osoran i grub, razbježali bi se iz tvoje blizine. I zato, praštaj im i moli da im bude oprošteno i dogovoraj se s njima o poslovima koji predstoje, ali kad se odlučiš, onda se na Boga osloni, jer Bog, zaista, voli one koji se na Njega oslonjaju.“

Muhamed, a.s., je u svojoj praksi sproveo sve ove principe i zato su rezultati njegovog pozvanja bili tako grandiozni.

Nedavno smo svjedočili otvaranju novosagrađene džamije u našem džematu u Boråsu. Slušajući o tome kako je tamo tekao cijeli projekt gradnje ove džamije, ne možemo se oteti dojmu da su se naši ljudi u tom džematu rukovodili upravo principima iz ovog ajeta. Ističemo to, uz dovu Gospodar u nagradu i ibret, ispunjeni silnim ponosom.

I na kraju, s obzirom da nam se polahko, ali sigurno primiče najljepši gost u toku godine, ramazani šerif, koristimo priliku da uputimo dovu dragom Bogu da nam dadne da dočekamo dolazak najdražeg gosta i da u njemu osjetimo sve njegove blagodati!

Esslamu alejkum!

Idriz-ef. Karaman

U DŽEMATU BORÅS OTVORENA NOVOSAGRAĐENA DŽAMIJA



U subotu, 13. aprila 2019., u gradu Borås otvorena je veleljepna novosagrađena džamija. Ovoj svečanosti prisustvovalo je preko hiljadu džematlija iz gotovo svih džemata Islamske zajednice Bošnjaka u Švedskoj. Izaslanik reisu-l-uleme na ovom skupu bio je muftija za Evropu dr. Osman-ef. Kozlić.

Svečanost je imala dva dijela. Prvi dio je obavljen

u kongresnoj sali u centru grada, a drugi u džamiji. U programu su učestvovali specijalni gosti iz BiH hafizi Omer Zulić, Hamza Lavić i Ćamil Hajadrević, te hor ilahija i kasida džemata Borås.

Prisutnima su se prvo obratili domaćini, predsjednik džemata Merfid Selimović i predsjednik građevinskog odbora Jasmin Fočo



Prikazan je i kratak film o toku gradnje, a onda su se skupu biranim riječima obratili glavni imam Islamske zajednice Bošnjaka u Švedskoj Idriz-ef. Karaman, predsjednik Bosanskog kulturnog centra zapadne Švedske Dževad Rekanović, predsjednik Merhameta Švedske Fehim Halilović, prvi sekretar ambasade BiH u Švedskoj Edin Ljutović, te muftija dr. Osman-ef. Kozlić. Skupu su se obratili i predstavnici grada Borås, Vlade Švedske, Policije, Crkve i Trezvenjačke organizacije NBV.

Prvi dio svečanosti završen je zajedničkim ručkom, koji su vrijedni domaćini organizirali za sve prisutne.

Program u džamiji otpočeo je svečanim otvaranjem džamije.

Čast da džamiju otvori dobila je majka najvećeg vakifa džamije Muhameda Islamovića Džulfida hanuma. Nakon toga je klanjan podne namaz, a program je nastavljen učenjem Kur`ana, ilahija i kasida. U ovom dijelu skupu su se kratko obratili imam džemata Elvedin-ef. Bešlija i glavni imam Islamske zajednice Bošnjaka u Švedskoj, a onda je muftija za Evropu dr. Osman-ef. Kozlić održao vazuu nasihat.

Program je završen dovom, koju je proučio muftija Kozlić.



Ovaj 13. april ostat će u džematu Borås, ali i Islamskoj zajednici Bošnjaka u Švedskoj, upisan zlatnim snovima i teško će ga iko od prisutnih ikad zaboraviti. (I.K.)



Održana Skupština Islamske zajednice Bošnjaka u Švedskoj



U subotu, 23. marta 2019. godine u gradu Jönköping održana je redovna Skupština Islamske zajednice Bošnjaka u Švedskoj. Skupštini je prisustvovalo 59 zastupnika iz 24 džemata, kao i većina članova Izvršnog odbora i drugih organa IZBUŠ-a.

Uvodno ašere proučio je Mubin-ef. Neimarlija, a onda su polaznici mektebske nastave džemata Jönköping izveli zanimljiv kulturni program, nakon čega su imami IZBUŠ-a sve prisutne počastili jednom lijepom ilahijom. Svečani dio Skupštine nastavljen je prezentacijom Islamske zajednice Bošnjaka u Švedskoj u slici i riječi, da bi se na kraju ovog dijela Skupštini obratili gosti iz organizacija „Merhamet“ Švedske, Bemufa i NBV-a.

Poslije pauze za namaz i ručak Skupština je nastavila radni dio.

Za predsjednika Skupštine izabran je Jasmin Fočo iz džemata Borås.

U skladu sa predloženim dnevnim redom, prvo su podneseni i, nakon diskusije, usvojeni: izvještaji o radu i finansijama, te izvještaj Revizione komisije.

U drugom dijelu zasjedanja usvojen je Pravilnik o imamima IZBUŠ-a, dok Prijedlog standardiziranog džematskog statuta nije dobio potrebnu većinu.

Nakon toga je Skupština izabrala članice Komisije za ženski aktivizam, u sastavu Mavlija Alić, predsjednica, koja će po funkciji biti član Izvršnog odbora IZBUŠ-a, te članice Komisije Merjema Jašarević i Minela Jakupović.

U nastavku zasjedanja Skupštine predstavljani su i usvojeni Plan rada i Budžet za 2019. godinu, a onda je Skupština, povodom nemilih događaja u posljednje vrijeme, donijela zaključak da se osude svi teroristički napadi, kao i ekstremistička divljanja u našoj domovini Bosni i Hercegovini.

Skupštinsko zasjedanje okončano je Fatihom pred duše šehida sa Novog Zelanda, BiH i svih drugih krajeva, kao i članova IZBUŠ-a, koji su preselili na Ahiret.

Završnu dovu proučio je glavni imam Idriz-ef. Karaman. (I.K)

// WWW.IZB.SE

Priče iz dijaspore i domovinskih zemalja promovisane u Švedskoj

Priče iz dijaspore i domovinskih zemalja, autora mr. Admira Lisice, a u povodu Dana nezavisnosti Bosne i Hercegovine, promovisane su u južnom dijelu Švedske.

Naime, u organizaciji Udruženja "Rubin" Eslov, BKF Malmo i Islamske zajednice Bošnjaka u Švedskoj, ovo djelo uspješno je promovisano u Eslovu, Helsingborgu i Malmeu.

Osim autora, u ulozi promotora knjige Priče iz dijaspore i domovinskih zemalja bila je švedska političarka i aktivistkinja bošnjačkih korijena Umihana Rašović-Kasumović.

Poseban fokus promotora bio je na Danu nezavisnosti Bosne i Hercegovine, koji je bio i jedan od povoda organiziranje promocija u ova tri grada na jugu Švedske.

Nakon Švedske, Priče iz dijaspore i domovinskih zemalja biće promovisane u Danskoj, tačnije u Odenseu i Kopenhagenu.



...
Bosna ima kuću
u kući živi starica
njen osmijeh je ajet o
Džennetu.

Izuj obuću kad prelaziš
Koranu, Glinu
Savu i Drinu
Operi noge u rijekama
Bosna je ćilimom zastrta.

Nedžad Ibrišimović

Imami IZBUŠ-a posjetili Njemačku



Udruženje Ilmije je krajem marta, tačnije od 25. do 27., organizovalo odlazak u studijsku posjetu džematu Kamp-Lintfort. Na ovu edukativnu ekskurziju je putovalo 12 imama, na čelu sa glavnim imamom Idriz-ef. Karamanom. Tom prilikom, u gradu Kamp-Lintfort su posjetili Općinu. Imame je primio gradonačelnik, prof. dr. Christoph Landscheidt, koji je govorio o raznim projektima sa muslimanima u vidu boljeg socijalnog djelovanja, iz čega se dalo zaključiti da općina tog grada ima jako lijep odnos sa našim bošnjačkim džematom, kao i muslimanima drugih nacija. Također, imami su posjetili i baptističku crkvu i razgovarali sa njihovim pastorom Marcus Bastekom. Inače Pastor Marcus je sa Mustafa-ef. Klancom glasnogovornik Teološkog kruga u KampLintfort. Mustafa ef. Klanco je govorio o svom džematu, načinu rada i djelovanja. Ove razmjene iskustava i sastanci imaju edukativan karakter i u tu svrhu su veoma korisna, imajući za cilj poboljšanje rada imama, što bi svakako imalo značajan utjecaj na razvoj svakog džemata. U povratku su imami svratili u Hamburg i posjetili naš džemat u kojem imamsku funkciju obavlja Halim -ef. Alibašić. Ovom prilikom se zahvaljujemo našim domaćinima u Njemačkoj.

Molimo Allaha Uzvišenog da naši imami budu prvi primjeri i vodiči svojih zajednica i džematlija na putu ka Njegovom zadovoljstvu!

Izvršni odbor Udruženja Ilmije

Sastanak sa ministricom Amandom Lind



Povodom terorističkog napada na džamije u Novom Zelandu ministrica kulture i demokratije u Vladi Švedske, Amanda Lind , održala je sastanak sa predstavnicima islamskih organizacija u Švedskoj u četvrtak, 21.3.2019.

Ministrica je tom prilikom izrazila duboko žaljenje zbog užasnog terorističkog napada na džamije u Novom Zelandu. Kazala je, također, da ovo nije samo napad na muslimane nego je napad na demokratske vrijednosti i osnovna ljudska prava kao što su pravo na život i ispoljavanje svoje vjere. Iskazala je zabrinutost sve češćim napadima na vjerske organizacije u cijelom svijetu.

Učesnici sastanka su iskoristili priliku i upoznali ministricu sa aktivnostima svojih organizacija, uslovima u kojima džemati rade, te rastućoj netrepeljivosti prema muslimanima u Švedskoj.

Ministrici je predato istraživanje o ugroženosti džamija i džemata kao i o sigurnosti u Švedskoj u 2018. koje je uradio CEMFOR, Upsala univerzitet

U BORÅSU ODRŽANA SJEDNICA IZVRŠNOG ODBORA IZBUŠ-a

U subotu, 13. aprila i nedjelju, 14. aprila 2019. godine, u Boråsu je održana sjednica Izvršnog odbora Islamske zajednice Bošnjaka u Švedskoj.

Prvi dio sjednice održan je u subotu. U ovom dijelu analizirana je protekla Skupština Islamske zajednice Bošnjaka u Švedskoj, te dogovorena realizacija njenih odluka i zaključaka.



Pred kraj rada prvog dana članovima Izvršnog odbora obratio se novoimenovani muftija IZ u BiH za Evropu dr. Osman-ef. Kozlić, koji je boravio u službenoj posjeti Švedskoj povodom otvaranja novosagrađene džamije u Boråsu.

U nastavku sjednice u nedjelju diskutirano je tekućim pitanjima i doneseno nekoliko odluka iz nadležnosti Izvršnog odbora, od kojih posebno treba izdvojiti formiranje Disciplinske komisije IZBUŠ-a. (I.K.)

U NORRKÖPINGU ODRŽANA KONFERENCIJA O RADU SA MLADIMA I SEMINAR ZA IMAME



U gradu Norrköping 20. aprila 2019. godine održana je konferencija o radu sa mladima. Konferenciji su prisustvovali predstavnici džemata i imami IZBUŠ-a, te predstavnici Bemufa. Specijalni gosti ispred Rijasetu IZ u BiH bili su Mensur-ef. Pašalić, šef Odjela za dijasporu, Vehid-ef. Arnaut, rukovodilac Ureda za zekat i Muhamed Jugo, Mreža mladih.

Centralna tema konferencije bila je kako povezati Mrežu mladih i Bemuf Švedske, te kakvu ulogu u tome imaju imami IZBUŠ-a.

Pored dva podnesena referata, radilo se po radionicama i na kraju došlo do zaključka da koordinatori Mreže mladih u Švedskoj, u stvari, treba da budu rukovodioci Bemufa, potmognuti imamima svojih džemata.

Još je konstatirano da je veoma važno poznavati normativna akta i druga uputstva u radu sa mladima, te raditi na njihovom poboljšanju.

Nakon završene konferencije učesnici na konferenciji prisustvovali su donatorskoj večeri, koju je džemat Norrköping organizirao povodom nastavka radova na izgradnji njihove džamije.

Sutradan, u nedjelju, 21. aprila, održan je predramazanski seminar imama IZBUŠ-a.

U prvom dijelu Mensur-ef. Pašalić govorio je aktuelnostima iz Uprave za vanjske poslove dijasporu, a onda je Vehid-ef. Arnaut predstavio aktivnosti Ureda za zekat.

Nakon podnesenih referata razvila se veoma plodna diskusija u kojoj je posebno istaknut značaj angažmana imama u akciji prikupljanja sredstava zekata i sadekatu-l-fitra, te adekvatnog medijskog praćenja ove cjelokupne akcije.

I.K.

U NORRKÖPINGU ODRŽANA DONATORSKA VEČE

U subotu, 20. aprila 2019., u Norrköpingu je održana donatorska večer. Ova manifestacija organizirana je povodom nastavka gradnje džamije u ovom gradu, a prisustvovalo joj je preko 300 džematlija džemata Norrköping i njihovih gostiju iz drugih džemata Islamske zajednice Bošnjaka u Švedskoj.



Posebni gosti na ovom skupu bili su poznati hafiz Aziz Alili i njegov sin Ahmed, a u programu su još učestvovali dječiji i omladinski hor džemata domaćina, te imami iz Švedske Hasan-ef. Jašarević i Mubin-ef. Neimarlija.

Prisutnima su se obratili predsjednik džemata Mensur Mustafić i glavni imam Islamske zajednice Bošnjaka u Švedskoj Idriz-ef. Karaman, a veoma nadahnuto predavanje održao je Mensur-ef. Pašalić, šef Odjela za dijasporu Rijasetu Islamske zajednice u BiH.



Na kraju ovog prelijepog skupa saopćena je cifra prikupljenih sredstava od blizu 900 000 kruna.

I.K.



U DŽEMATU MALMÖ ODRŽAN ŠESTI PO REDU EDUKATIVNI SEMINAR ZA ŽENE



U subotu, 30. marta 2019. godine u gradu Malmö održan je šesti po redu edukativni seminar za žene. Gost predavač iz BiH bila je profesorica Maida Brčić sa temom „Važnost održavanja tradicije za ramazan“. Kao i svi raniji, ovaj seminar je bio dobro posjećen, a pored predavanja organiziran je rad po radionicama. Nakon seminara upriličeno je slobodno druženje, uz nezaobilaznu bh. bogatu kuhinju, u čijoj su pripremi učestvovala vrijedne džematlije džemata Malmö.

Kao što rekosmo, bio je ovo šesti po redu seminar. Prvi seminar organiziran je u mjesecu oktobru, kada je gošća iz BiH bila mr. Belma Bešlić Bjelak, sa temom „Brak kao štiti i utočište ili brak kao okov i kazna.“

Krajem novembra organiziran je drugi, sa gošćama iz BiH dr. Anelom Hasanagić i prof.

Adnom Zulić. Tema je bila „Model odnosa psihosocijalnih faktora na radnom mjestu i njihovog utjecaja na dobrobit radnika.“

Decembarski seminar je imao temu „Higijena tijela sa aspekta medicine i vjere.“, a gošća je bila dr. Minela Izmirlić.

Četvrti po redu seminar bio je krajem januara, kada je gošća iz BiH bila prof. Lejla Tutić, sa temom „Život sa svrhom.“.

Krajem februara održan je peti po redu seminar, a gošća iz BiH bila je dr. Safija Softić Namas, a tema je bila „Zdrava ishrana poslovne žene, domaćice i majke“.

Organizator ovih seminara je odjel za ženski aktivizam džemata Malmö, na čelu sa vrijednom muallimom Merjema-hanumom Jašarević.

(I.K.)

TRADICIONALNA VEČER KUR'ANA U DŽEMATU HELSINGBORG

U subotu, 06. aprila 2019. godine / 01. ša'bana 1440. h. godine poslije ikindije namaza organizovana je šesta tradicionalna „Večer Kur'ana“ u džematu Helsingborg u Švedskoj.



Program je započet učenjem ašereta koje je proučio Hamza-ef. Terzić. Dobrodošlicu svim prisutnim uputio je prof. Nezir-ef. Špiodić, vrijedni imam u džematu Helsingborg. Nezir-ef. je je ukratko iskazao veliko zadovoljstvo što uspijeva sa džematskim odborom i džematlijama organizovati ovaj program. Hasan-ef. Jašarević, omladina i polaznici mekteba Helsingborg su svojim milozvučnim glasovima napojili i razgalili duše prisutnih džematlija.

Glavni imam u IZBUŠ, Idriz-ef. Karaman je čestitao na ovom poduhvatu i ustrajnosti koju ulaže ovaj džemat u širenju vjere islama.

Gost predavač na Večeri Kur'ana bio je hafiz mr. Maid-ef. Ibrahimović, imam u džematu Soukbunar, MIZ Sarajevo. Govorio je o važnosti Kur'anu koji je svjetlo i uputa svakom vjerniku u njegovom životu.

Osim ovog džemata hafiz mr. Maid-ef. I. je održao predavanje u džematima Malme, Landskrona i Halmstad.

Realizaciju ove predivne noći u džematu Helsingborg finansijski je pomogao džematski odbor, kao i džematlije istoimenog džemata. Vrijedno je spomenuti hanume iz džemata koje su pripremile zakusku. Na kraju programa Nezir-ef. se zahvalio svim prisutnim džematlijama i uputio dovu Allahu, dž.š., da nagradi sve one koji su na bilo koji način pomogli ovu Večer Kur'ana. Molimo Allaha dž.š. da nam pomogne na putu naše vjere islama i da nas sastavi s našim Posalnikom, a.s., u lijepom Džennetu. Amin!

/Tekst za časopis Preporod napisao:
hafiz mr. Maid-ef. Ibrahimović/

AKTIVNOSTI DŽEMATA VÄXJÖ OKO SIGURNOSTI DŽEMATSKOG LOKALA



Bošnjačka Islamska zajednica u Växjö je usljed teškog terorističkog čina na Novom Zelandu, uzela korak dalje u smislu sigurnosti posjetioca našeg mesdžida.

Imajući u vidu da nas je najviše petkom u toku džume namaza, stupili smo u usku saradnju sa lokalnom policijom i zajedno s njima došli do najboljih rješenja za novonastalo stanje.

Iako i dalje nema direktnih indicija za postojanje prijetnje, u toku džume namaza, instruirani su redari koji ispred mesdžida motre na situaciju dok istovremeno slušaju hutbu. S druge strane, u neposrednoj blizini je policija, najčešće u civilnom autu. Kad dođe do klanjanja farza džume namaza, redar zaključava vrata i klanja zajedno sa ostalima, a neposredno nakon predavanja selama, ponovo otvara džamiju i vraća se u svoju misiju.

Nedavno je jedan džematlija zakasnio na sami farz, pa kad je vidio da su vrata zaključana, provirio je kroz prozor, nebi li vidio dokle su klanjači stigli. Nakon samo nekoliko sekundi, "čuvari javnog reda i mira" su se stvorili kod njega te ga legitimisali i pitali zašto viri u mesdžid. Prestravljeni džematlija je sve brzo objasnio i sve se završilo sa osmijehom, a najveći osmijeh je ostao na mojim usnama, jer sam zaista osjećao da klanjačima možemo obezbjeđiti sigurnost.

Nasu plodonosnu saradnu sa lokalnom policijom nastavljamo dalje. Organizovan je seminar o nasilju iz mržnje prema drugom i drugačijem, gdje smo zajedno sa članovima odbora Islamskog

centra u Växjö, poslušali jako korisno predavanje o tome kako reagirati i koju pomoć od policije možemo dobiti u slučaju izloženosti mržnje prema nama.

Svakako preporučujem i drugim džematima da poslušaju ovo izlaganje i rado ću etablirati kontakt ako je to potrebno.

A saradnja sa lokalnom policijom ide i dalje. U znak velike zahvalnosti, želimo sve policajce počastiti kolačima.

Nije to baš tako jednostavno, ali naš direktni kontakt, Scott Goodwin inače lokalni profil i vrlo poznata licnost u našem gradu, pregovara sa čefom policije kako da se ovo praktično i sigurno izvede. Rodila se i želja da se grupa koja direktno radi na sigurnosti nasih mesdžida, pozove na druženje baš u mesdžidu, što ćemo zasigurno popratiti Bosanskom kuhinjom vrijednih ruku naših poštovanih hanuma, a za naše najmlaže organizovati posjetu policijskom autu (mozda i za neke malo starije).

Koristimo i ovo javno obraćanje da se službenicima lokalne policije u Växjö a i vođama projekta "grupa za nasilje iz mržnje" srdačno zahvalimo te posebnu zahvalnost upućujemo našem kontaktu Scott Goodwin, bez kojega sve ovo sigurno nebi bilo ovako zanimljivo i uspješno.

Ovu priliku obraćanja koristimo također da sa članovima IZBUŠ-a ponosno podjelimo informaciju da je i nas džemat, odlukom nedavno održane redovne Skupštine, oficijelno pokrenuo projekat vlastitog vakufa, a prvi razgovori sa Växjö Kommun su već održani.

Divno li je biti od onih koji su od Gospodara Svijetova izabrani da se baš oni brinu o sigurnosti i stanju drugih muslimana.

Gospodaru, Hvala Tebi na tom zadatku i olakšaj nam našu zadaću. Amin!

Amel Osmanović
predsjednik džematskog odbora BIZ Växjö

HADŽ 2019.

Ovim obavještavamo zainteresirane kandidate za hadž da Islamska zajednica Bošnjaka u Švedskoj i ove godine organizira odlazak na hadž.

Polazak na hadž je 28. jula, a povratak 19. augusta ili u noći između 19. na 20. augusta.

Za dobijanje vize potrebno je pribaviti sljedeće dokumente:

1. Pasoš koji važi još najmanje 6 mjeseci. Ukoliko pasoš nije švedski, potrebna je boravišna dozvola koja, također, važi još najmanje 6 mjeseci.
2. Personbevis, sa pečatom i originalnim potpisom službenog lica, na engleskom jeziku
3. Dvije fotografije pasoškog formata bez naočala sa svijetlom pozadinom
4. Žuti karton za vakcinu protiv meningitisa
5. Za žene mlađe od 45 godine, ukoliko im je mahrem (pratilac) muž, potrebno je dostaviti vjenčani list na engleskom jeziku, a ako je mahrem otac, brat ili sin, personbevis na engleskom jeziku koji potvrđuje rodbinsku vezu.
6. Popunjen i potpisan formular za prijavu za hadž (skinuti sa internet stranice IZBUŠ-a ili preuzeti u svom džematu)

Formular prijave za hadž, kopiju pasoša i dokaz o uplati akontacije od 10 000 kr. poslati odmah, a najkasnije do 24. maja 2019., na adresu Sekretarijata IZBUŠ-a ili na mail: kontakt@izb.se

Kompletna dokumentacija, uključujući i dokaz o uplati sredstava, mora stići u Sekretarijat IZBUŠ-a (Bosniakiska islamiska samfundet, Åkerssjövägen 10, 461 53 Trollhättan), najkasnije do 28. juna 2019.

Uplate (överföring) se vrše na račun agencije broj: 83279 6943658366, kod Swedbank

Napominjemo da su svi kandidati za hadž su, na osnovu novog zakona u Saudijskoj Arabiji, dužni da u predstavništvima ambasade ove zemlje u Stockholmu ili Göteborgu ostave otisak prstiju. O terminu odlaska u ova predstavništva kandidati će biti blagovremeno obaviješteni.

Cijena aranžmana je 50 000 SEK.

U cijenu je uračunato sljedeće:

- povratna avionska karta,
- takse i transporti u Saudijskoj Arabiji,
- smještaj u hotelima na bazi polupansiona,
- ihram i 5 litara zem-zema.

U cijenu nije uračunat kurban.

Napominjemo, također, da je broj mjesta ograničen i da prednost imaju oni kandidati koji se prvi prijave.


Osim toga, odlukom Ministarstva za hadž Saudijske Arabije, oni kandidati koji su hadž obavili u zadnjih pet godina, moraju uplatiti dodatnu taksu od ca. 5 000 kruna.

Kontakt telefon za dodatne informacije:

076 310 24 47 ili 0520 49 90 64

U SUSRET RAMAZANU

hutba glavnog imama Idriz-ef. Karamana



Hvala uzvišenom Gospodaru i salavat i selam
Njegovom poslaniku Muhamedu, s.a.v.s.
Draga braćo i poštovane sestre!

A ko dobrovoljno učini više dobra, za njegovo
dobro će biti. Međutim, bolje vam je, neka znate,
da postite.

Uskoro nam stiže ramazan-i-šerif, te stoga
današnju hutbu posvećujemo ovom nama
posebnom gostu.

Ramazan je onaj mjesec u kojem je spušten
Kur`an, kao uputa ljudima s jasnim oznakama
Pravog puta i istinskog razlučivanja. Ko od vas u
tom mjesecu bude kod kuće, neka ga isposti, a
ko bude bolestan ili na putu, neka posti isti broj
dana izvan ramazana.

U suri El-Bekare, od 183. do 185. ajeta, stoji:

”O, vi koji ste uzvjerovali! Propisuje vam se post,
kao što je propisan i onima prije vas – da biste
se sačuvali – u danima koji su određeni, a
onome ko od vas bude bolestan ili na putu – isti
broj drugih dana. Oni koji ga ne mogu podnijeti
dužni su se iskupiti ishranom jednog siromaha.

Bog hoće da vam je lahko, neće da vam teško
bude, a da ipak ispunite određeni broj dana te da
veličate Boga zato što vas je uputio i da budete
zahvalni.”

Prenosi se da je Muhamed, a.s., ovako govorio pred dolazak ramazana:

”O ljudi, prikućio vam se ćasni mjesec, mjesec blagoslova, sreće i napretka, mjesec u kojem je Lejletu-l-Kadr, koja je vrjednija od hiljadu mjeseci.

Bog vam je naredio da postite danju, a ramazanske noći provodite u dobrovoljnom ibadetu.

Ko u ramazanu obavi doborovljnu nafilu namaz, kao da je obavio obavezni farz namaz u nekom drugom mjesecu, a ko obavi farz namaz u ramazanu, kao da je obavio 70 farzova izvan ramazana.”

Muhamed, a.s., je još rekao:

„Allah,dž.š., vam je propisao ramazanski post, a ja teravih namaz učinio sunnetom, pa, ko ga isposti, iskreno vjerujući Allaha, dž.š., bit će mu oprošteni raniji grijesi.“

Velika je ovo šansa, draga braćo i poštovane sestre!

Kad pomislimo kako lahko upadamo u neke pogreške, pa čak i velike grijeha, ovo obećanje Poslanikovo, a.s., zvući, zaista, nevjerovatno.

Iskoristimo ovu šansu. Pripremimo se za dolazak ramazana. Iskreno se pokajmo za učinjene grijeha. Obećajmo dragom Bogu da više nećemo svjesno grijehiti, a kad ramazan dođe, postu pristupimo sa najvećom ozbiljnošću, jer post nije samo ostavljanje hrane i pića. Postom se učimo da ostavimo sve što ne valja.

A pred kraj ramazana post upotpunimo davanjem sadekatu-l-fitra. Vitre podijelimo za sve članove naše porodice.

Odlukom Rijaseta Islamske zajednice u BiH, kod nas je najniža kategorija vitara 100 kruna po osobi, druga kategorija je 150, a treća 200 kruna.

Pored vitara, najveći broj naših ljudi i zekat plaća u toku ramazana. Prilika je ovo da podsjetimo da je vrijednost nisaba 3 405 eura (oko 35 000 kruna). Dakle, ukoliko smo posjedovali najmanje ovoliko sumu novca tokom cijele godine, obavezni smo na cijelu sumu koja nam je pregodinila platiti 2,5% zekata.

Da još kažemo, kao i ranijih godina, zekat i sadekatu-l-fitr isključivo se uplaćuju preko blokova koje je Rijaset štampao posebno za ovu svrhu.

Ovu hutbu završavamo dovom da nam dragi Bog primi sve naše ibadete koje smo činili u mjesecu redžebu i ša`banu, da nam ih učini blagoslovljenim i da hairli dočekamo i iskoristimo sve blagodati ramazana.

Ramazan mubarek olsun!

Idriz-ef. Karaman, 19.04.2019.

VISINA ZEKATA I SADEKATUL-FITRA ZA RAMAZAN 2019. GODINE

Odlukom Rijaseta Islamske zajednice u BiH, kod nas u Švedskoj bit će tri kategorije **sadekatu-fitra** (vitara):

- PRVA** kategorija je 100 kruna po osobi;
- DRUGA** kategorija je 150 kruna po osobi;
- TREĆA** kategorija je 200 kruna po osobi;

Kada je u pitanju obračun **zekata** visina nisaba iznosi
3.405 eura (oko 35.000 kruna)

Dakle, ukoliko je neko posjedovao najmanje ovoliku sumu novca tokom cijele godine, obavezan je na cijelu sumu platiti 2,5% zekata.

Fetvom/šerijatskom odlukom Rijaset Islamske zajednice u BiH, zekat i vitre se obavezno uplaćuju u Bejtul-mal Islamske zajednic, i to u džematima preko blokova koje je Rijaset štampao posebno za ovu svrhu.



PITANJA I ODGOVORI O RAMAZANSKOM POSTU

/na pitanja odgovara fetva-i-emin, prof. dr. Enes Ljevaković/

• Vrijeme iftara tokom putovanja

Pitanje: Profesionalni sam šofer, međunarodni transport. Imam nijet da postim Ramazan, ako Bog da. Međutim, trebam savjet. Ako započnem s postom u Bosni, a taj dan sam već u Njemačkoj (ili nekoj drugoj državi) za iftar, po kojoj vaktiji da se ravnam, i da li ima posebnih propisa za ovakve slučajeve?

Odgovor:

Postać treba zapostiti/sehuriti i iftariti prema mjestu u kojem se trenutno nalazi, bez obzira na promjenu vremena iftara u mjestu dolaska u odnosu na mjesto gdje je započeo post. Njega obavezuje lokalno vrijeme (vaktija) u svakoj prilici. Prema tome, Vi kao putnik imate pravo da ne postite kada ste na putu, uz obavezu da te dane napostite poslije ramazana. Međutim, ako se odlučite da postite, a to je bolje kako Kur'an kaže, tada ćete se iftariti prema vaktiji mjesta u kojem se nalazite u vrijeme iftara. Isto važi i za sehur.

• Post i rad u staračkom domu

Pitanje: Radim kao njegovatelj/medicinski radnik i imam posla naravno sa stolicom, urinom, ranama, krvlju. Da li moj posao kviri moj post u mjesecu Ramazanu? Zaista sam u dilemi, pošto je to "prljav" posao da li treba da se postiš?

Odgovor:

Rad u staračkom domu nije u opreci s formom, ciljem i svrhom posta, bez obzira na poslove koje obavljate. Takvi poslovi kao i njihove popratne pojave i stanja ne kvare post te nema formalne niti suštinske smetnje da postite tokom mjeseca ramazana.

• Da li injekcija kviri post?

Pitanje: Za vrijeme posta, dobio sam jake bolove, toliko jake da jednostavno nisam više mogao izdržati i otišao sam do Hitne pomoći gdje sam primio injekciju. Injekcija nije sadržala nikakve hranjive materije, nastavio sam postiti u nadi da se nisam omrsio. Da li sam postupio ispravno?

Odgovor:

Obična injekcija ne kviri post. Prema tome, ako se nije radilo o infuziji, Vaš post je ispravan. A Allah najbolje zna.

• Nadoknađivanje propuštenog ramazanskog posta

Pitanje: Ako ne postim mjesec Ramazan, na koji način to mogu nadoknaditi, recimo koliko ljudi da nahranim ili koji još način postoji?

Odgovor:

U slučaju nemogućnosti da se postiš neki dan ili cijeli ramazan, obaveza je napostiti propuštene dane. Fidja ne može zamijeniti post ukoliko je osoba zdravstveno sposobna da postiš makr i u dogledno vrijeme. Ako je osoba trajno nesposobna za post, u smislu da jedav podnosi post (oronuli starac i starica), onda se post u njihovom slučaju može zamijeniti fidjom, tj. za svaki dan ramazana nahraniti jednog siromaha (jedan dan koliko iznosi sadekatul-fitr).

O ramazanskom postu, ali i drugim temama iz vaše svakodnevnice, odgovore možete pronaći na web stranici Islamske zajednice:

<http://www.islamskazajednica.ba/dini-islam/pitanja-i-odgovori>



Muhammed, a.s., je rekao: „Allah Uzvišeni je rekao: - Svako čovjekovo djelo pripada njemu, izuzev posta! on pripada Meni i Ja posebno za njega nagrađujem!“

“Ko provede Lejletu-l-kadr u ibadetu, vjerujući i nadajući se nagradi, biće mu oprosteni prethodni grijesi!” (Buhari)

Aiša, r.a, kaže: “Pitala sam Poslanika, a.s.: - Allahov Poslaniče, šta misliš, kada bih znala u kojoj noći se nalazi Lejletu-l-kadr, šta bih u njoj učila! On je odgovorio: 'Uči ALLAHUMME INNEKE AFUVVUN, TUHIBBUL- AFVE, FA'FU 'ANNI / Allahu, Ti si Onaj koji oprašta, Ti voliš praštanje, pa oprosti meni!’”(Tirmizi)

Poslanik, a.s., je rekao: “Ko se ne prođe lažnog govora i lošeg djela, Bogu nije potrebno da on ostavlja svoje jelo i piće!” (Buhari)

Poslanik, a.s., rekao: „Ko isposti ramazan, sa čvrstim imanom (vjerom), nadajući se samo Allahovoj nagradi, biće mu oprosteni grijesi koje je prije učinio!“ (Buhari)

Poslanik, a.s., rekao: „U Džennetu imaju vrata koja se zovu Rejjan. Na njih, izuzev postača, niko drugi neće ući...!“

Iftarska dova:

**ALLAHUME INNI LEKE SUMTU
VE BIKE AMENTU
VE 'ALEJKE TEVEKKELTU
VE'ALA RIZKIKE
EFTARTU!**

**"GOSPODARU MOJ, ZBOG
TEBE POSTIM, U TEBE
VJERUJEM, NA TEBE SE
OSLANJAM, I TVOJOM SE
HRANOM IFTARIM!"**

Članovima Islamske zajednice Bošnjaka u Švedskoj, kao i svim vjernicima upućujemo iskrenu čestitku u povodu nastupajućeg mubarek mjeseca Ramazana.

Činimo dovu Uzvišenom Bogu da ramazanske dane provedete u istinskom dobročinstvu i dobrom zdravlju, zajedno sa svojim porodicama, prijateljima i komšijama!

ISLAMSKA ZEJEDNICA BOŠNJAKA U ŠVEDSKOJ



*Ramazan
Šerif
Mubarek
Olsun!*

BILTEN

Informativne novine
Islamske zajednice
Bošnjaka u Švedskoj

GLAVNI UREDNIK
Idriz-ef. Karaman,
glavni imam

IZVRŠNI UREDNIK
Nezir-ef. Špiodić

SEKRETARIJAT

Mail: kontakt@izb.se

Tel: 0520-49 90 64

Mob: 0763-10 24 47

Adresa: BIS, Åkerssjövägen 10, 461 53 Trollhättan

Radno vrijeme: Radnim danom od 8.00 do 16.30 h

POZIV NA SARADNJU

Oglasite se i Vi u Biltenu IZB u Švedskoj!

Javite nam se sa vašim tekstom, prijedlogom, primjedbom i sugestijom!

e-mail: bilten@izb.se

www.izb.se